


ML  
336  
L44  
1726  
v. 2











Digitized by the Internet Archive  
in 2021 with funding from  
University of Toronto



記

安溪李光地註

樂記蓋孔門之遺書。先儒以爲公孫尼子次撰。而曰通天地貫人情。辨政治。其語精矣。然又謂河間獻王與諸生等采周官及諸子言樂事者以爲樂記。則似此書爲漢儒編輯。蓋當時禮樂道微。傳說不同。故也。又劉向校書時得樂記二十三篇。與河間所傳於王禹者不同。今樂記斷取纔十一篇。曰樂本。曰樂論。曰樂施。曰樂言。曰樂禮。曰樂情。曰樂化。曰樂象。曰賓牟賈。曰師乙。曰魏文侯。此外尚有



十二篇曰奏樂曰樂器曰樂作曰意始曰樂穆曰說律曰季札曰樂道曰樂義曰昭本曰昭頌曰竇公二十三篇之目具於劉向別錄既與河閒異傳而前十一篇之文不異益知記樂者在漢以前非諸生采集之書矣但十一篇之說皇氏以爲事不分明熊氏亦曰依別錄十一篇之次竇牟賈師乙魏文侯今此記有魏文侯乃次竇牟賈師乙爲末則是今之樂記十一篇之次與別錄不同推此而言其樂本以下亦雜亂矣愚謂此書章段正義雖



十一篇分屬而條理甚疎則皇氏熊氏之疑是  
然戴氏集禮司馬遷作史記皆在劉向之前自  
說文侯以下章句微有先後而文義無甚差互則  
凡正說樂理之處仍是古人原文未經後來變亂  
其十一篇名目或者劉向加增耳皇氏以爲事不  
分明則可能氏謂古有十一篇之次而今雜亂則  
恐未然也今定篇第以別錄爲主而刪去十一篇  
之說案其辭指離合別爲十章大抵不離所謂通  
天地貫人情辨政治者而其詞達理粹前後互相



發明則非洙泗之徒斷不能及抑此十一篇以魏文侯終後十二篇又以竇公終竇公卽文侯樂工漢文帝時獻其本經者也文侯戰國賢君獨能留心禮樂之事意此記卽是子夏竇公諸人之所論述故以其篇退而居後者讓也

凡音之起由人心生也人心之動物使之然也感於物而動故形於聲聲相應故生變變成方謂之音比音而樂之及于戚羽旄謂之樂

心感物而動則形於言而有聲矣所謂詩言志者



也有言則自相應和。而高下疾徐之變生焉。所謂歌永言者也。其相應之變合節成調。則謂之音。所謂聲。永者也。於是比合人之聲音。被之樂器。以爲之樂。復爲之舞蹈之器。以動其容。焉而樂成矣。所謂律和聲八音克諧者也。皆所以發明首句音由心生之義。以下數節。則皆申此節之意也。

樂者音之所由生也。其本在人心之感於物也。是故其哀心感者其聲焦。以殺其樂心。感者其聲啞。以緩其喜心。感者其聲發。以散其奴心。感者其聲粗。以厲



其敬心感者其聲直以廉其愛心感者其聲和以柔  
六者非性也感於物而後動是故先王作樂所以感之  
者故禮以道其志樂以和其聲政以一其行刑以防  
其姦禮樂刑政其極一也所以同民心而出治道也  
此節言聲也申感物而動故形於聲之意首句乃  
是言音樂以引起之。○此記言樂而每兼禮又并  
及於刑政蓋四事惟一理故於此曰禮樂刑政其  
極一也本意既明以後倣此

凡音者生人心者也情動於中故形於聲聲成文謂



之音是故治世之音安以樂其政和亂世之音怨以  
怒其政乖亡國之音哀以思其民困聲音道與政  
通矣言爲君者爲臣角爲民徵爲事羽爲五者不  
亂則無怙慝之音矣宮亂則荒其君驕商亂則陂其  
臣端角亂則憂其民怨徵亂則哀其事勤羽亂則危  
其財匱五者皆亂迭相陵謂之慢如此則國之滅亡  
無日矣鄭衛之音亂世之音也比於慢矣桑間濮上  
之音亡國之音也其政散其民流誣上行私而不丁  
止也

此節言音也。申變凡。謂之音之意。宮商角徵羽之配皆然。調與聲言之。而以調爲主。宮調洪厚。君之道也。商調激烈。臣之操也。羽和暢。民之理也。徵調疾速。事之宜也。凡調繁細。物之象也。其調中之聲亦然。案上言聲則推其出於人心。此言音則本其由於政治。其實則一而已矣。蓋政治者所以同民之心而和其聲音也。前後脈相承。細說可見。

凡音者生於人心者。樂者通倫理者也。是故知聲



不知音者禽獸是也知音而不知樂者衆庶是也  
唯君子爲能知樂是故審聲以知音審音以知樂審  
樂以知政而治道備矣是故不知聲者不可與言音  
不知音者不可與言樂知樂則幾於禮矣禮樂皆得  
謂之有德德者得也

此節言樂也申比音而樂之之意審樂知政所以  
幾於禮也故曰見其禮而知其政

右第一章○此章論音樂之本生於人心原於  
政治蓋推其始而言之也



是故樂之隆非極音也。食饗之禮非致味也。清廟之瑟朱絃而疏越壹倡而三歎有遺音者矣。大饗之禮尚玄酒而俎腥魚大羹不和。有遺味者矣。是故先王之制禮樂也。非以極口腹耳目之欲也。將以教民平好惡而反人道之正也。

大樂之音希淡。大饗之禮素質。則是非極音致味以窮口腹耳目之欲也。皆爲民情有好惡焉。而易於失其正。故制爲禮樂以平其情。以復其性而已矣。蓋樂者生於人心。而感乎人心。起於風俗。而移

乎風俗其道和爲終始者也故此節承上章慎所以感之者而言作樂之用以下亦皆申此節之意也。○陳氏曰朱絃練朱絲以爲絃絃不練而聲清練之則聲濁越瑟底之孔也疏而通之使其聲遲緩皆質素之聲非要眇之音也初發倡之時僅有三人從而和之言和者少也愚謂詩惟頌多不叶韻而且深厚簡短故以琴瑟歌清廟之詩者常以一八唱之而使三人應和而贊歎之所以成其聲響而足其餘音是其本章之疎淡而有所遺也。



人生而靜天之性也感於物而動性之欲也物至知  
知然後好惡形焉好惡無節於內知誘於外不能反  
躬天理滅矣夫物之感人無窮而人之好惡無節則  
是物至而人化物也人化物也者滅天理而窮人欲  
者也於是有悖逆詐僞之心有淫佚作亂之事是故  
强者脅弱者暴寡知者詐愚勇者苦怯疾病不養  
老幼孤獨不得其所此大亂之道也

此民之好惡所以不平而人道所以不正反申  
上之意以起下文之端也。○人生而靜古注以



人初生未有情欲時言之非也乃泛論人之有生  
其靜而未發則天性具焉爾須以程朱之說爲至  
是故先王之制禮樂人爲之節衰麻哭泣所以節喪  
鐘鼓干戚所以和安樂也昏姻冠笄所以別男  
女射鄉食饗所以正交接也禮節民心樂和民聲  
政以行之刑以防之禮樂刑政四達而不悖則王道  
備矣

此又正申教民平好惡而反人道之正之意節喪  
紀喪也和安樂祭也別男女冠昏也正交接射鄉

朝聘也。此節專以禮言。而樂在其中。亦禮先樂後之意也。

樂者爲同。禮者爲異。同則相親。異則相敬。樂勝則流。禮勝則離。合情飾貌者。禮樂之事也。禮義立。則貴賤等矣。樂文同。則上下和矣。好惡著。則賢不肖別矣。刑禁暴。爵舉賢。則政均矣。仁以愛之。義以正之。如此則民治行矣。

相親則不離。故惡平而得其正也。相敬則不流。故好平而得其正也。此節又承節民心和民聲而言。



其效之效也。

樂由中出。禮自外作。樂由中出。故靜。禮自外作。故文。大樂必易。大禮必簡。樂至則無怨。禮至則不爭。揖讓而治天下者。禮樂之謂也。暴民不作。諸侯賓服。兵革不試。五刑不用。百姓無患。天子不怒。如此則樂達矣。合父子之親。明長幼之序。以敬四海之內。天子如此則禮行矣。

樂以心言。和平生於中。故易而靜。禮以身言。中正形於外。故簡而文。至於不怨不爭。則天下化之。而

無有作惡無有作好矣此節又承相親相敬而言其效之極也

右第二章。此章論作樂之用感乎人心成乎政治蓋要其終而言之也然人心感政治成則和樂又興焉故曰其道相爲終始

大樂與天地同和大禮與天地同節和故百物不失節故祀天祭地明則有禮樂幽則有鬼神如此則四海之內合敬同愛矣禮者殊事合敬者也樂者異文合愛者也禮樂之情同故明王以相沿也故事與時



竝名與功偕。故鐘鼓管磬羽籥干戚樂之器也。屈伸  
俯仰綴兆舒疾樂之文也。簠簋俎豆制度文章禮之  
器也。升降上下周還裼襲禮之文也。故知禮樂之情  
者能作。識禮樂之文者能述。作者之謂聖。述者之謂  
明。明聖者述作之謂也。

禮樂之理原於天地。惟與天地同和。故於天地所  
生之物而能使之各得其情也。惟與天地同節。故  
用以報本反始而能使之各安其位也。禮樂之道  
與天地鬼神同運竝行。此所以能通天下爲一心。

而合敬同愛也是之謂禮樂之情而百王不能變者若夫事則因時而異名則以功而殊器數文爲則隨宜而損益是皆所謂禮樂之文也必知禮樂之情而後可以有作其文則明者述之而已此節因上二章而極論禮樂之原本以下亦皆申此節之意

樂者天地之和也禮者天地之序也和故百物皆化序故羣物皆別樂由天作禮以地制過制則亂過作則暴明於天地然後能興禮樂也



此申同和同節之意而言興禮樂者必先明乎此也。

論倫無患樂之情也。欣喜歡愛樂之官也。中正無邪禮之質也。莊敬恭順禮之制也。若夫禮樂之施於金石越於聲音用於宗廟社稷事乎山川鬼神則此所與民同也。

此申禮樂情文之意論倫無患者講論人倫而出於心之所安無拘苦之意也。四者皆所謂禮樂之情惟聖人爲能盡之。至於金石聲音之節享祀鬼

神之事則是以其文措之天下者耳非其本也

王者功成作樂治定制禮其功大者其樂備其治辯者其禮具千戚之舞非備樂也執亨而祀非達禮也五帝殊時不相沿樂三王異世不相襲禮樂極則憂禮粗則偏矣及夫敦樂而無憂禮備而不偏者其唯大聖乎

此申事與時並名與功偕之意百王所相沿者禮樂之情爾若禮樂之文則各象其功德而不必相沿襲也所以不相沿襲者蓋文久而偏弊則必因



其時俗而更新之使之樂而不憂正而不偏非達於禮樂之情之聖能如是乎

天高地下萬物散殊而禮制行矣流而不息合同而化而樂興焉春作夏長仁也秋斂冬藏義也仁近於樂義近於禮樂者敦和率神而從天禮者別宜居鬼而從地故聖人作樂以應天制禮以配地禮樂明備天地官矣

此又復申同和同節之意至於禮制樂作則百物不失而可以祀天祭地故曰天地官矣官猶位也

天尊地卑。君臣定矣。卑高以陳。貴賤位矣。動靜有常。小大殊矣。方以類聚。物以羣分。則性命不同矣。在天成象。在地成形。如此則禮者天地之別也。地氣上齊。天氣下降。陰陽相摩。天地相盪。鼓之以雷霆。奮之以風雨。動之以四時。煖之以日月。而百化興焉。如此則樂者天地之和也。

申天高地下四句之意

化不時則不生。男女無辨則亂。升天地之情也。及夫禮樂之極乎天而蟠乎地。行乎陰陽而通乎鬼神。窮



極遠而測深厚樂著大始而禮居成物著不息者  
也著不動者地也一動一靜者天地之間也故聖  
人曰禮樂云

申天地官焉之意禮樂之理既原於天地則其效  
至於格天地可知矣故推其功用以爲窮極乎天  
蟠結乎地流行乎陰陽感通乎鬼神蓋所以和同  
天人之際使之無閒者也極天蟠地則是窮高極  
遠而測深厚也行乎陰陽鬼神則是著大始而居  
成物也天則不息地則不動陰陽鬼神則一動一

靜於天地之間惟禮樂有以幽贊而潛通之此聖人之教所以禮云樂云者以此也

右第三章○此章論作樂之理本於天地之中和而其終成於位育之至化學者必通其情而不可以徒泥其文也

昔者舜作五絃之琴以歌南風夔始制樂以賞諸侯故天子之爲樂也以賞諸侯之有德者也德盛而教尊五穀時熟然後賞之以樂故其治民勞者其舞行綴遠其治民逸者其舞行綴短故觀其舞知其德聞



其諡知其行也。

天子既作樂以自象其功德。又於諸侯之有功德者。則作樂以賞之。其舞之行綴。各稱其治民之優劣。故見其舞。則知其德。猶聞其諡。而知其行也。

大章。章之也。咸池。備矣。韶。繼也。夏。大也。殷周之樂。盡矣。

此卽大司樂之六舞也。因上言賞樂之舞節。象其德政。故極言德政之盛者。至六代之舞。無以加也。天地之道。寒暑不時。則疾風雨不節。則饑饉。教者民之

寒暑也。教不時則傷事。事者民之風雨也。事不節則無功。然則先王之爲樂也。以法治也。善則行象德矣。寒暑風雨者。天地所以感物之和也。教化政事者。王者所以感民之和也。教化修而德尊。政事舉而功成。則天地之和應之。而樂可作矣。樂以法治。故治善則舞綴之行。各象其德也。此總說上兩節之意。

右第四章。○此章申第一章之意。明樂之由於政治。但第一章以音言。此章以舞言也。



夫豢豕爲酒。非以爲禍也。而獄訟益繁。則酒之流生禍也。是故先王因爲酒禮。壹獻之禮。賓主百拜。終日飲酒。而不得醉焉。此先王之所以備酒禍也。故酒食者所以合歡也。樂者所以象德也。禮者所以綴淫也。是故先王有大事。必有禮以哀之。有大福。必有禮以樂之。哀樂之分。皆以禮終。樂也者。聖人之所樂也。而可以善民心。其感人深。其移風易俗。漢志俗下有易字故先王著其教焉。

窮口腹之欲。則酒能生禍矣。惟主於合歡而已。則

禮不在於飲食也。禮樂之作猶是故。禮以節哀樂之情。而樂以感人心之善。皆所謂教民平好惡而反人道之正也。以下亦皆申說此意。

夫民有血氣心知之性。而無哀樂喜怒之常。應感起物而動。然後心術形焉。是故志微噍殺之音作。而民思憂。曄諧慢易繁文簡節之音作。而民康樂。粗厲猛起奮末廣賁之音作。而民剛毅。廉直勁正莊誠之音作。而民肅敬。寬裕肉好順成和動之音作。而民慈愛。流辟邪散狄成滌濫之音作。而民淫亂。



此卽第一章喜怒哀樂愛敬之六事也。然彼言有是情故發是聲。此則言感是聲而動是情。蓋承上節感人深之意。而申第二章人生而靜以下之義也。

是故先王本之情性。稽之度數。制之禮義。合生氣之和。道五常之行。使之陽而不散。陰而不密。剛氣不怒。柔氣不懾。四暢交於中。而發作於外。皆安其位而不相奪也。然後立之學等。廣其節奏。省其文采。以繩德厚。律小大之稱。比終始之序。以象事行。使親疎貴賤

長幼男女之理皆形見於樂故曰樂觀其深矣

承上節而言先王所以作樂教人者其序如此皆安其位以上作樂之本也以下則皆作樂之用也本之情性故有以合生氣之和稽之度數故有以道五常之行四暢者陰陽剛柔之氣和平而暢達也簡省文采專務德厚亦以本情性者言也律小大比終始以象事行亦以稽度數者言也

土敝則草木不長水煩則魚鼈不大氣衰則生物不

遂世亂則禮慝而樂淫是故其聲哀而不莊樂而不



安慢易以犯節流湏以忘本廣則容姦狹則思欲感  
條暢之氣滅平和之德是以君子賤之也

此節與上節相反蓋時俗之樂而非先王之樂也  
其哀樂等六聲亦正與志微嘒殺六聲相應

凡姦聲感人而逆氣應之逆氣成象而淫樂興焉正  
聲感人而順氣應之順氣成象而和樂興焉倡和有  
應回邪曲直各歸其分而萬物之理各以類相動也  
並承上兩節而結其意

是故君子反情以和其志比類以成其行姦聲亂色

不留聰明淫樂慝禮不接心術惰慢邪僻之氣不設  
於身體使耳目鼻口心知百體皆由順正以行其義  
然後發以聲音而文以琴瑟動以干戚飾以羽旄從  
以簫管奮至德之光動四氣之和以著萬物之理是  
故清明象天廣大象地終始象四時周還象風雨五  
色成文而不亂八風從律而不姦百度得數而有常  
小人相成終始相生倡和清濁迭相爲經故樂行而  
倫清耳目聰明血氣和平移風易俗天下皆寧

上言正樂淫樂以類相動故此言學樂之君子必



先謹淫樂之感然後發以正樂之和以之治已則  
心平而氣順措之天下則風移而俗易也。清明  
廣大至德之光也終始周旋四氣之和也五色成  
文以下萬物之理也

故曰樂者樂也君子樂得其道小人樂得其欲以道  
制欲則樂而不亂以欲忘道則惑而不樂是故君子  
反情以和其志廣樂以成其教樂行而民鄉方可以  
觀德矣。

申上節修己治人之意以結首節所謂感人之深

移風易俗之易也

右第五章○此章申第二章之意明樂之感乎人心成乎政治而其語益加詳矣

德者性之端也樂者德之華也金石絲竹樂之器也詩言其志也歌咏其聲也舞動其容也三者本於心然後樂器從之是故情深而文明氣盛而化神和順積中而英華發外惟樂不可以爲僞

此卽第三章情文之指明文之生於情也以下亦

皆申說其意



樂者心之動也。聲者樂之象也。文采節奏聲之飾也。君子動其本，樂其象，然後治其飾。是故先鼓以警戒，三步以見方，再始以著往復，亂以飭歸，奮疾而不拔，極幽而不隱，獨樂其志，不厭其道，備舉其道，不私其欲。是故情見而義立，樂終而德尊。君子以好善，小人以聽過。故曰：生民之道，樂爲大焉。

此申第一節之意。言君子之厚於情而不輕於著其文者如此也。樂將作，必先播鼗鼓以警戒。舞將動，必三舉步以示其方。舞者之進而往也，必再起。

樂節以著其意而不急於往其退而歸也則爲之  
亂樂以飭之而不緩於歸是故其始也情餘於文  
從容暇豫雖奮疾而不拔也其旣也情見乎文發  
揚昭宣雖極幽而不隱也情餘於文者獨樂其志  
不厭其道者也情見乎文者備舉其道不私其欲  
者也獨樂其志故情見而義立不私其欲故樂終  
而德尊

樂也者施也禮也者報也樂樂其所自生禮反其所  
自始樂章德禮報情反始也樂也者情之不可變者



禮也者理之不可易者也樂統同禮辨異禮樂之  
說管乎人情矣

此復兼禮樂以申第一節之意至愛從心而出故  
曰施品節稱情而立故曰報樂所自生反所自始  
孟子所謂禮樂之實事親從兄者是也從心而出  
故情不可變而至愛周流稱情而立故理不可易  
而品節有定凡此皆禮樂之情也

窮本知變樂之情也著誠去僞禮之經也禮樂負天  
地之情達神明之德降興上下之神而凝是精粗之

體領父子君臣之節是故大人舉禮樂則天地將爲  
昭焉天地訢合陰陽相得煦嫗覆育萬物然後草木  
茂區萌達羽翼奮角觫生蟄蟲昭蘇羽者嫗伏毛者  
孕鬻胎生者不殯而卵生者不殯則樂之道歸焉耳  
此又推禮樂之情達於天地卽第三章天地官焉  
之意人情之變不可勝窮故窮本則知變人情之  
僞尤難於去故著誠以去僞本窮誠著則禮樂之  
情得矣故作禮樂以依像天地之情則神明之德  
可通而上下之神可致也天地之情神明之德理



之精者也而不越乎人倫日用之間故禮樂之道  
精粗之體妙合而凝雖微極於天地鬼神之幽而  
顯則領乎父子君臣之節也爲昭者言其理察乎  
天地也天地訢合以下則是至和之感而萬物育  
焉者第三章之極乎天而蟠乎地者是也。

樂者非謂黃鍾大呂弦歌干揚也樂之末節也故童  
者舞之鋪筵席陳尊俎列籩豆以升降爲禮者禮之  
末節也故有司掌之樂師辨乎聲詩故北面而弦宗  
祝辨乎宗廟之禮故後尸商祝辨乎喪禮故後主人

是故德成而上藝成而下行成而先事成而後是故  
先王有上有下有先有後然後可以有制於天下也  
又總結上數節以盡首節之意

右第六章。○此章申第三章之意明樂有本原  
而不在乎聲容之迹彼以明聖之沿革明之此  
以德藝之貴賤證之也。

君子曰禮樂不可斯須去身致樂以治心則易直子  
諒之心油然而生矣易直子諒之心生則樂樂則安安  
則久久則天天則神天則不言而信神則不怒而威



致樂以治心者也致禮以治躬則莊敬莊敬則嚴威  
心中斯須不和不樂而鄙詐之心入之矣外貌斯須  
不莊不敬而易慢之心入之矣

子諒韓詩外傳作慈良此言禮樂之切於身心者  
如此。

故樂也者動於內者也禮也者動於外者也樂極和  
禮極順內和而外順則民瞻其顏色而弗與爭也望  
其容貌而民不生易慢焉故德輝動於內而民莫不  
承聽理發諸外而民莫不承順故曰致禮樂之道舉

而錯之天下無難矣。

此節言以禮樂治身心則其感於人者如此顏色  
發於心極和故民不與爭容貌形於身極順故不  
生易慢。

樂也者動於內者也禮也者動於外者也故禮主其  
減樂主其盈禮減而進以進爲文樂盈而反以反爲  
文禮減而不進則銷樂盈而不反則放故禮有報而  
樂有反禮得其報則樂樂得其反則安禮之報樂之  
反其義一也。



此節言禮樂之道相濟治其身心者亦當相濟乃  
不偏也禮者搏節退讓故曰減樂者欣喜歡愛故  
曰盈搏節退讓而粲然有文者減而進者也欣喜  
歡愛而秩然有節者盈而反者也報者往來報答  
之謂有往來報答則和行乎其中矣有終始節奏  
則敬存於其內矣

夫樂者樂也人情之所不能免也樂必發於聲音形  
於動靜人之道也聲音動靜性術之變盡於此矣故  
人不耐無樂樂不耐無形形而不爲道不耐無亂先

王耻其亂故制雅頌之聲以道之使其聲足樂而不  
流使其文足論而不息使其曲直繁瘠廉肉節奏足  
以感動人之善心而已矣不使放心邪氣得接焉是  
先王立樂之方也

上文竝論禮樂此下又專言樂也此節則言樂之  
因人心而作者如此○案其文足論而不息卽所  
謂可以語可以道古者也蓋古人之爲樂者必有  
事實而非虛詞故可以講論而知其意如孔子之  
說大武其一端也



是故樂在宗廟之中。君臣上下同聽之。則莫不和敬。  
在族長鄉里之中。長幼同聽之。則莫不和順。在閨門  
之內。父子兄弟同聽之。則莫不和親。故樂者。審一以  
定和。比物以飾節。節奏合以成文。所以合和父子君  
臣。附親萬民也。是先王立樂之方也。

此節言樂之感乎人心者。如此審其情之一。所以  
定和。比其物之殊。所以飾節。○案此言先王作樂。  
達乎鄉黨閭巷閨門。此所以風移而俗易也。與後  
世但議於朝廟之間。專爲具文者異矣。

故聽其雅頌之聲志意得廣焉執其干戚習其俯仰  
得莊焉行其綴兆要其節奏行列得正焉  
不能免也夫樂者先王之所以飾喜也軍旅鈇鉞者  
先王之所以飾怒也故先王之喜怒皆得其儕焉喜  
則天下和之怒則暴亂者畏之先王之道禮樂可謂  
盛矣

此節言樂之聲容皆本於天地中和之理人情所  
不能自己者故習之則得其情不可徒觀其飾而



忘其意也

右第七章。○此章總論樂之本末功效。蓋通前六章而發明其未盡之意也。章首兼論禮樂於身心之要。最爲深切。其後論樂亦分三節。始於人心之動。中於感人之效。而終於天地之命中和之紀。故知此章是總論也。

賓牟賈侍坐於孔子。孔子與之言及樂。曰。夫武之備戒之已久何也。對曰。病不得其衆也。

孔子問大武之樂。擊鼓備戒已久。而後興舞何也。

對武王憂人心之未得故欲集衆而後動也  
咏歎之淫液之何也對曰恐不逮事也

咏歎淫液謂歌者咨嗟留連之聲也對言武王順  
天應人恐不及於事故其形於聲者如此○案此  
非舞者之自歌也蓋堂下自舞而堂上歌以應之  
歌言其志舞動其容故合之而當日之事可見  
然揚蹈厲之已蚤何也對曰及時事也

謂初舞時手足卽發揚蹈地而猛厲也對言及時  
成功故其見於容者如此



武坐致右憲左何也對曰非武坐也

憲舊讀爲軒言舞者之跪右足至地而左足軒仰也愚謂以下文分左右觀之疑是招右列之人如左法而皆坐耳賈以武王初得天下未敢寧居故疑其非武坐也

聲淫及商何也對曰非武音也子曰若非武音則何音也對曰有司失其傳也若非有司失其傳則武王之志荒矣子曰唯止之聞諸萇弘亦若吾子之言是也

聲淫及商謂歌奏之聲雜以商調也案國語引武王牧野之事音皆尚宮周官大祭祀之樂無商故大武之樂於時有濫入商聲者而賈以非武音對云若果是武音則是殺伐之心動而武王之志荒矣賈之對惟此爲得故夫子亟是之。

竇牟賈起免席而請曰夫武之備戒之已久則旣聞命矣敢問遲之遲而又久何也子曰居吾語汝夫樂者象成者也總干而山立武王之事也發揚蹈厲太公之志也武亂皆坐周召之治也。



遲字待也。當舞之初，備戒已久，賈言之而夫子  
不以爲非。故曰：「旣聞命矣。」又問其終舞者若有所  
待而立於綴遲，而且久，是何意也。然賈前數對者  
能知其意而未能指其實，又疑左右竝坐之非。故  
夫子復從初告之曰：「當其備戒之時，舞人持干山  
立不動者，敬天之命，乃武王之事也。及其發揚蹈  
厲之蚤，敎民伐暴，乃太公之志也。至於武樂將終，  
左右皆坐，偃武修文，乃周召之治也。若咏歎淫泆，  
與聲淫及商，則聲歌之事，非關舞節。且賈對亦已。」

詩之故不復告也

武始而北出再成而滅商三成而南四成而南  
是五成而分周公左召公右六成復綴以崇天  
子

欲答賈遲久之問故又總武樂六成而通說其意  
其始也舞者自南而北以象武之北出則備戒而  
總干山立時也再成而象武之滅商則發揚蹈厲  
時也三成舞者象武返南四成則象其威服南國  
而疆理之之事五成舞者分爲左右以象周召則



武亂皆坐時也。六成復歸綴位。以象天子尊居。則所謂遲之又久者。卽此時矣。

夾振之而駟伐。盛威於中國也。分夾而進。事蚤濟也。久立於綴。以待諸侯之至也。

其初成。再成。五成。北出滅商。及周召左右之事。前文已言之。故此但言三成。四成。六成之事。南回之後。二人振鐸以夾舞者。而以干戈四外擊刺。乃武既克殷而威服中國也。既伐則分夾而進。不復遲留。乃武功早成。不黷其威也。至復於綴位。久立不

動則武王垂拱以治天下而待諸侯之自歸也此  
句已答賈遲久問意下文復推言之。

且女獨未聞牧野之語乎武王克殷反商未及下車  
而封黃帝之後於薊封帝堯之後於祝封帝舜之後  
於陳下車而封夏后氏之後於杞投殷之後於宋封  
王子比干之墓釋箕子之囚使之行商容而復其位  
庶民弛政庶士倍祿濟河而西馬散之華山之陽而  
弗復乘牛散之桃林之野而弗復服車甲衅而藏之  
府庫而弗復用倒載干戈包之以虎皮將帥之士使



爲諸侯名之曰建纛然後天下知武王之不復用兵也散軍而郊射左射狸首右射騶虞而貫革之射息也裨冕搢笏而虎賁之士說劍也祀乎明堂而民知孝朝覲然後諸侯知所以臣耕藉然後諸侯知所以敬五者天下之大教也食三老五更於大學天子袒而割牲執醬而饋執爵而醕冕而總干所以教諸侯之弟也若此則周道四達禮樂交通則夫武之遲久不亦宜乎

此復推久立於綴之意以答賈之問也言武王偃

武功之速而修文德之深漸仁摩義以致太平則  
非遲而又久不足以形像之也合此章而觀之則  
其始也備戒之久以見聖人無尚武之心其終也  
立綴之久以見聖人惟德化之務其間所謂發揚  
蹈厲盛威中國者亦皆不俄頃而功成此所以商  
聲之淫必知其非武聲而左右皆坐正所以爲武  
坐也○案古舞法之不傳久矣近代又爲五聲五  
行之說空有俯仰之節而無復功德之象則其失  
先王之意遠矣幸而此章問答至爲詳明不獨見



古人之曲折而且可以爲後世之折衷不獨備雅舞之形容而且可以知俗樂之變態有意禮樂之事者不可不反覆於茲焉

右第八章○此章專言樂舞之理

子贛見師乙而問焉曰賜聞聲歌各有宜也如賜者宜何歌也師乙曰乙賤工也何足以問所宜請誦其所聞而吾子自執焉寬而靜柔而正者宜歌頌廣大而靜疏達而信者宜歌大雅恭儉而好禮者宜歌小雅正直而靜廉而謙者宜歌風肆直而慈愛者宜歌

商溫良而能斷者宜歌齊。夫歌者直已而陳德也。動已而天地應焉。四時和焉。星辰理焉。萬物育焉。

國風雅頌凡三言靜者。非靜則不能涵濡體味。而得其性情之正也。言寬而靜。又言廣大而靜者。寬則已造於廣大之域而安焉。廣大所以至於寬也。恭儉卽廉謙。然好禮則有學矣。廉謙者資質之美而已。六者各就其德性所近者而歌之。蓋取其聲之易入。而因以涵養成就其所未至也。

故商者五帝之遺聲也。商人識之。故謂之商。齊者三



代之遺聲也。齊人識之，故謂之齊。明乎商之音者，臨事而屢斷，明乎齊之音者，見利而讓。臨事而屢斷，勇也；見利而讓，義也。有勇有義，非歌孰能保此？

風雅頌之義，世所共知，故獨舉商齊言之。肆，直而能慈愛，則斷而不傷物矣。溫良而能斷，則讓而不失己矣。蓋皆因其德而成之。專言濟其偏者，非也。故歌者上如抗，下如隊，曲如折，止如槩，倨中矩，句中鉤，累累乎端如貫珠。故歌之爲言也，長言之也，說之故言之，言之不足，故長言之，長言之不足，故嗟嘆之。

問樂

之嗟嘆之不足故不知手之舞之足之蹈之也子貢  
如抗者其聲斗然而升如隊者其聲頓然而落如  
折者轉音之清如橐木者收音之靜蓋無餘聲泛  
調以夾雜乎其間故其高下作止之節分明如此  
歌有安置齊整而方者則其倨中矩歌有宛轉迴  
環而圓者則其句中鉤蓋得乎緩急疾徐之中故  
其聲自與規矩合者又如此總一歌之全體而象  
之則其聲氣接續而句字明潔所謂累累乎端如



貫珠也。末又極言聲由心生之趣。至於手舞足蹈。則舞之理亦具是矣。

右第九章。○此章專言詩歌之理。

魏文侯問於子夏曰。吾端冕而聽古樂。則惟恐臥。聽鄭衛之音。則不知倦。敢問古樂之如彼。何也。新樂之如此。何也。子夏對曰。今夫古樂。進旅退旅。和正以廣。弦匏笙簧。會守拊鼓。始奏以文。復亂以武。治亂以相。訊疾以雅。君子於是語。於是道古。修身及家。平均天下。此古樂之發也。

旅言其齊也。進退皆齊。則和正而且廣。所謂三步以見方也。琴瑟笙簧。必待拊鼓而動。所謂先鼓以警戒也。始奏則從容而象文。所謂再始以著往也。復亂則謹嚴而象武。所謂復亂以飭歸也。相雅皆樂器名。相以治其雜亂。所謂極幽而不隱也。雅以察其疾速。所謂奮疾而不拔也。凡此皆言古樂和緩中正之美。而且有理義事實以貫乎其中。故可以講論善道。稱說古人而用之。爲修己治人之方也。



夫新樂進俯退俯姦聲以濫溺而不止及優侏儻  
不知父子樂終不可以語不可以道古此

進俯退俯容之陋也溺而不止聲之淫也甚而至  
於倡優侏儻之類子女溷雜則絕無父子之禮矣  
無義理而不足以講論無事實而不足以道古今  
之與古不同如此兩言發者由其根本異也

今君之所問者樂也所好者音也夫樂者與音相近  
而不同文侯曰敢問何如子夏對曰夫古者天地順

而四時當民育德而五穀昌疾疢不作而無妖祥此  
之謂大富然後聖人作爲父子君臣以爲紀綱紀綱  
旣正天下大定天下大定然後正六律和五聲弦歌  
詩頌此之謂德音德音之謂樂詩云莫其德音其德  
克明克明克類克長克君王此大邦克順克俾俾于  
文王其德靡悔旣受帝祉施于孫子此之謂也

此言古樂所由作也引皇矣之詩本不甚切於樂  
必盡其詞者勉君故也

心之所好者  
明音平文侯曰敢問溺音何從出



也子夏對曰鄭音好濫淫志宋音燕女溺志衛音趨  
數煩志齊音敖辟喬志此四者皆淫於色而害於德  
是以祭祀弗用也。

此言新樂所由起也古者天子祭祀亦陳列國四  
夷之樂而觀之獨此四者不用是大司樂所謂淫  
聲過聲凶聲慢聲者與

詩云肅雝和鳴先祖是聽夫肅肅敬也雝雝和也夫  
敬以和何事不行爲人君者謹其所好惡而已矣君  
好之則臣爲之上行之則民從之詩云誘民孔易此

之謂也。

溺音旣不用於祭祀故必和敬之音然後先祖聽之也音樂淫正之閒好惡不可不謹蓋上行而下化之乃移風易俗之機也。

然後聖人作爲鞀鼓控楬壎篪此六者德音之音也然後鐘磬竽瑟以和之干戚旌狄以舞之此所以祭先王之廟也所以獻酬酢也所以官序貴賤各得其宜也所以示後世有尊卑長幼之序也。

此起處然後兩字發語辭也控楬祝敬也鐘磬以



爲樂之紀。鋼琴瑟笙竽以爲樂之音。奏是四者莫重焉。故前文云正六律和五聲。弦歌詩頌是謂德音者。此也。執鼓控楬所以節樂而已。塤箎亦竽笙簫管之次。而此乃特表六器以爲德音之音者。蓋先質後文樂而有節之意。前謂弦匏笙簧會守拊鼓治亂以相訊疾以雅正此意也。夫樂聲淡則聽心平。樂容正則禮節得。此所以用之祭祀饗燕而貴賤尊卑長幼各安其位也。

鐘聲鏗鏘以立號號以立橫橫以立武君子聽鐘聲

則思武臣石聲磬磬以立辨辨以致死君子聽磬聲  
則思死封疆之臣絲聲哀哀以立廉廉以立志君子  
聽琴瑟之聲則思志義之臣竹聲濫濫以立會會以  
聚衆君子聽竽笙簫管之聲則思畜聚之臣鼓鼙之  
聲謹謹以立動動以進衆君子聽鼓鼙之聲則思將  
帥之臣君子之聽音非聽其鏗鏘而已也彼亦有所  
合之也

鐘聲遠達故曰號磬聲堅確故曰辨絲聲細密故  
曰廉竹聲繁雜故曰聚鼓聲振作故曰動○案是



諸器者皆聖人所以動至和之氣消殺伐之聲非  
如此所云也子夏對君之言若此者抑恐其湛於  
淫樂而忽封疆之憂惑於聲色而忘文武之士故  
言是以惕其心焉亦賢者告君之術也抑此五聲  
者即前所謂鐘磬竽瑟之類也而執壎柷楊不與  
焉蓋就所謂鏗鏘可聽之音者而樂不忘憂則知  
所以反求其本而德音在是矣。

右第十章○此章總論聲舞樂器今樂古樂之  
別。

古樂經

卷之二

三



**易**風行地上觀先王以省方觀民設教觀大象傳

記云天子巡狩命太師陳詩以觀民風卽其事也

雷出地奮豫先王以作樂崇德廣薦之上帝以配祖

考豫大象傳

記云王者功成作樂夫樂者有象也傳曰因其

樂而知其德孝經云周公作樂以配天示祀

文王於明堂以配上帝天地之氣

聚而成聲者風雷是也風雷之氣

有和風有烈風有漭風勃之聲也風之於物而具聲  
亦各異此則聲音發於民心之於樂也言出應有陽  
氣無不達而正聲無不感此則作樂以揚功德之  
象也風聲出於萬物而因以散萬物之鬱聲音出  
於萬民而因以導萬民之傷此風詩所由采而鄉  
黨間巷之樂所由興也雷動於太和而因以宣太  
和之化樂本於盛德而因以成盛德之治此詩頌  
所由隆而郊廟朝廷之樂所由作也此蓋無由天  
作自然之理記所謂流而不息合同而化而樂生



易又曰鼓之以雷霆潤之以風雨而百化興焉如  
此則樂者天地之和也皆謂此也。

**書**協時月正日同律度量衡

律者自然之聲自然之氣其高下清濁皆有天機  
其長短大小皆有天則故可以律萬事而爲之本  
也自然之道既合乎天故其立法以天爲準一管  
之長九寸而三分之以上下生是皆天之數也天  
包乎地一而涵三三三之衍不可勝窮此天之數  
而律準之故日月星辰皆紀於天度量權衡皆紀

於律日有度之義晷刻永短與時進退是也律之  
分屬陽而度生焉故其法以十爲率十榦之節  
也終於九十而一氣備矣月有量之義受日爲光  
有滿有虧是也律之內積屬陰而量生焉故其法  
一分之幕十三黍有奇月每日退天之分也終於  
千二百黍而一龠成矣斗有權衡之義隨時低昂  
斟酌餘分是也長短多寡一以輕重爲斷而權生  
焉故其法合龠爲二十四銖成兩十六兩成斤三  
十斤成鈞四鈞成石三十二日而閏一日三十二



月而閏一月。四閏而交食一終之數也。記大人作則必以天地爲本。以日星爲紀。月以爲量。四時以爲柄。本者律爲萬事根本也。紀者度也。量者量也。柄者權衡也。故協時月正日。與同律度量衡。其道相益經緯也。

帝曰。夔命汝典樂教胄子。直而溫。寬而栗。剛而無虐。簡而無傲。詩言志。歌永言。聲依永。律和聲。八音克諧。無相奪倫。神人以和。

以上舜典

聲者。宮商角徵羽也。之五聲者。之於樂也。有調焉。

有音義調則統一曲而名之以宮商角徵羽者是  
已音則每字而別其爲宮商角徵羽者是已如唐  
開元樂譜鹿鳴三篇魚麗三篇爲黃鐘宮調關雎  
三篇鵲巢三篇爲無射商調此統一曲而名之者  
也然黃鐘之宮黃鐘也無射之商亦黃鐘也皆用  
黃鐘之律以起調畢曲其閒雜用七律則皆黃鐘  
所生之商角徵羽與夫變宮變徵也此則隨其音  
之所宜每字而別然每字之音雖亦蒙以五聲之  
號大要因其字音之抑揚叶律高下而已調之五



聲則其氣象音節迥然不侔。若知聲而不知調，則非知五聲者。

予欲聞六律五聲八音，在治忽以出納五言。

案漢書引此云：予欲聞六律五聲八音，七始，詠以出納五言。据理求之，漢志爲長。蓋七始者，宮徵商羽角變宮變徵也。七音之清濁皆始於人聲，故曰七始也。詠，卽舜典所謂歌詠言者。而五言，卽所謂詩言志之言也。以其言不離乎五音，故曰五言。雖有七始，究亦五音也。蓋上所謂五聲者，以調言也。

而名之以宮。名之以商。是也。下所謂七始者。以音言也。逐字而名之以宮。名之以商。是也。變宮變徵。不爲調。故聲止於五。若歌奏而有清濁高下之音。則七者備焉。故始究於七。七始之音。歌詠言者用之。而八音取法焉。其音有清濁高下。則有開發收閉。故曰詠以出納五言也。蓋舜典先言志詠言。而後及於五聲六律八音者。以人聲爲主。然後被以五聲。節以六律。而成以八音。循本以及末也。此先六律五聲八音。而後七始詠以出納五言者。



以律呂爲主。然後五聲應之。八音和之。雖人聲亦必受其均節焉。制法以存神也。舜典言五聲可包七始。然彼以調爲重。故只舉五聲。此以音爲重。則非七而音有缺矣。蓋二變之不爲調。與調之外又有音。皆賴此文而可見也。

夔曰。戛擊鳴球。搏拊琴瑟以詠。祖考來格。虞賓在位。羣后德讓。下管鼗鼓。合止祝敔。笙鏞以閒。鳥獸蹠蹠。簫韶九成。鳳皇來儀。以上益稷謨

戛擊搏拊。古注皆以爲樂器之名。惟沈括以屬於

鳴球琴瑟而爲作樂之義於理爲優虞賓一讀在  
位連羣后讀之蓋祭祀時丹朱無不至諸侯則有  
在位者有不在位者故言虞賓及在位之羣后皆  
德讓也据儀禮作樂凡四節升歌一也笙入二也  
閒歌三也合樂四也蓋堂上之樂工鼓琴瑟而歌  
堂下之樂或主笙或主管各以所宜故曰歌者在  
上匏竹在下匏竹卽笙管之謂也上下迭作則謂  
之閒上下竝作則謂之合準此以求則戛擊鳴球  
搏拊琴瑟以詠升歌之樂也下管鼗鼓合止祝敔



下管之樂也。笙鏞以間。閒歌之樂也。簫韶九成。合  
作之樂也。蓋鐘與笙相應者曰笙鐘。與歌相應者  
曰鏞鐘。今日笙鏞以間。則爲歌笙迭作明矣。合樂  
之時。則舞入。故春秋傳曰。見舞韶箭者。然則簫韶  
九成之爲合樂。又明矣。此舜享于宗廟之樂也。

**詩**猗與那與。置我鞀鼓。奏鼓簡簡。衍我烈祖。湯孫奏

假。綏我思成。鞀鼓淵淵。嘒嘒管聲。旣和且平。依我磬  
聲。於赫湯孫。穆穆厥聲。庸鼓有斲。萬舞有奕。我有嘉  
客。亦不夷懌。

商頌

朱傳云言鞀鼓管籥作於堂下其聲依堂上之玉磬無相奪倫者至九獻之後鐘鼓交作萬舞陳於庭則祀事畢矣愚謂鐘有頌鐘有笙鐘磬亦有頌磬有笙磬庸卽頌也與歌聲相應者也此庸字亦當包鐘磬然乃在懸者與上玉磬別也虞書云笙鏞以閒此直言庸以人聲爲重也以虞周之樂推之庸鼓有數當爲閒歌萬舞有奕當爲合樂蓋未至閒歌則笙庸未舉未至合樂則萬舞未陳而上管聲磬聲之相依者則渾升歌下管而言之實則



兩段也。

有瞽有瞽。在周之庭。設業設虡。崇牙樹羽。應田縣鼓。  
鞀磬柷圉。既備乃奏。簫管備舉。喤喤厥聲。肅雝和鳴。  
先祖是聽。我客戾止。永觀厥成。

周頌

瞽卽升歌之工也。虞業崇牙鼓鞀柷圉備而簫管  
奏焉。則下管之樂也。朱傳磬謂石磬者。堂下懸磬。  
所以別於虞書商頌鳴球依磬之文也。

**周禮**

膳夫王日一舉。以樂侑食。卒食以樂徹于造。

天官

注云殺牲盛饌曰舉。王日一舉。以朝食也。疏云一

日食有三時同食一舉案玉藻云皮弁以日視朝  
遂以食日中而餽餽者餽朝之餘則遂以食之爲  
朝食明矣以樂侑食卽王制云天子食日舉以樂  
案論語亞飯三飯四飯鄭云皆舉食之樂彼諸侯  
禮則天子日有舉食之樂可知又大司樂云王大  
食皆令奏鐘鼓彼大食自是朔食日舉之樂大司  
樂或不令奏故不言之爾造謂造食處卽廚是也  
天子祭祀歌雍以徹徹食器之時樂章未聞

鼓人掌教六鼓四金之音聲以節聲樂以和軍旅以



正田役教爲鼓而辨其聲用以雷鼓鼓神祀以靈鼓  
鼓社祭以路鼓鼓鬼享以鼗鼓鼓軍事以鼙鼓鼓役  
事以晉鼓鼓金奏以金錡和鼓以金鐃節鼓以金鐃  
止鼓以金鐸通鼓凡軍旅夜鼓鼙軍動則鼓其衆田  
役亦如之。

注云雷鼓八面鼓也靈鼓六面鼓也路鼓四面鼓  
也大鼓謂之鼗鼗鼓長八尺鼙鼓長丈二尺晉鼓  
長六尺六寸鐃鐃于也圓如碓頭大上小下樂作  
鳴之與鼓相和鐃鉦也形如小鐘軍行鳴之以爲

鼓節鐃如鈴無舌有秉執而鳴之以止擊鼓鐸大  
鈴也振之以通鼓鑿夜戒守鼓也司馬法曰昏夜  
四通爲大鑿夜半三通爲晨戒旦明立通爲發晌  
疏云言掌教者必教他官愚案眡瞭職雖不二擊  
鼓以上下參之其五鼓是眡瞭擊之則此所教者  
當教眡瞭也其晉鼓當教鑄師故其職曰掌金奏  
之鼓云以節聲樂者雷鼓靈鼓路鼓晉鼓是也以  
和軍旅者鼗鼓是也以正田役者鼙鼓是也田獵  
所以習戰則田鼓當與軍事同



鼓人凡祭祀百物之神。鼓兵舞帔舞者。

祭祀百物之神。亦謂民間所祭。其蜡祭之類與。

舞師掌教兵舞。帥而舞山川之祭祀。教帔舞。帥而舞社稷之祭祀。教羽舞。帥而舞四方之祭祀。教皇舞。帥而舞旱暵之事。以上地官

注云羽析白羽爲之。皇析五采羽爲之。形皆如帔。疏云掌教謂教野人。案春官樂師六舞并有旄舞人舞。此無此二者。彼教國子。故有二者。此教野人。故無旄舞人舞。愚按此職屬之地官。則此之山川

社稷四方旱暵蓋鄉遂之官帥其民而祭之非朝廷所用也記曰天子自立社曰王社爲百姓立社曰大社社稷之建所在有之及夫山川民所資財用也四方水旱民之所祈望禱請也若大司樂所祭之地元則王社所謂山川則嶽瀆又王者祭四望大雩帝用盛樂皆非舞師之事也

射人以射法治射儀王以六耦射三侯三獲三容樂以騶虞九節五正諸侯以四耦射二侯二獲二容樂以貍首七節三正大夫以三耦射一侯一獲一容樂



以采蘋五節二正士以三耦射豸侯一獲一容樂以采蘋五節二正。

注云射法王射之禮治射儀謂肆之也容者乏也待獲者所蔽也三侯者五正三正二正之侯也二侯者三正二正之侯也一侯者二正而已此皆與賓射於朝之禮也考工梓人職曰張五采之侯則遠國屬遠國謂諸侯來朝者也五采之侯卽五正之侯也正之言正也射者內志正則能中焉畫五正之侯中朱次白次蒼次黃元居外三正損元黃

二正去白蒼而畫以朱綠其外之廣皆居侯中三  
分之一中二尺大射禮豨作干胡犬也士與士射  
則以豨皮飾侯下大夫也大夫以上與賓射飾侯  
以雲氣用采各如其正九節七節五節者奏樂以  
爲射節之差疏云此言容儀禮大射鄉射言乏言  
容者以唱獲者容身於其中據人而言云乏者矢  
至此乏極據矢而說也大射云大侯九十繆侯七  
十豨侯五十二侯謂七十五十弓者也一侯者五  
十弓而已云皆與賓射於朝之禮者蓋梓人有三



等侯云張皮而棲鵠及司裘云虎侯熊侯豹侯皆  
大射之侯也其云張五采之侯及此五正之等賓  
射之侯也又云張獸侯則王以息燕及鄉射記云  
天子熊侯白質之等皆燕射之侯也畫五正之侯  
皆以相克爲次九節者五節先以聽七節者三節  
先以聽五節者一節先以聽尊者先聽多卑者少  
爲差皆留四節以乘矢拾發也

諸子凡樂事正舞位授舞器

諸子掌國子之戒令教治者而舞乃國子之事故

爲之正位授器焉其屬諸夏官則以春合諸學秋合諸射兼治其兵甲之事

**鄉射禮**主人揖讓以賓升大夫及衆賓皆升就席席工于西階上少東笙入立于縣中西面乃合樂周南關雎葛覃卷耳召南鵲巢采芣苢采蘋。

注云鄉射者州長春秋以禮會民而射於州序之禮謂之鄉者州鄉之屬鄉大夫或在焉不歌不笙不閒志在射畧於樂也不畧合樂者周南召南之風鄉樂也不可畧其正也六篇風化之原用之房



中以及朝廷鄉燕鄉射飲酒合金石絲竹而歌之  
疏云卿士大夫行射禮先行鄉飲酒禮鄉飲酒與  
鄉射自爲首尾天子諸侯射先行燕禮燕禮與大  
射自爲首尾也。

燕禮工入升自西階北面東上坐歌鹿鳴四牡皇皇  
者華笙入立於縣中奏南陔白華華黍乃閒歌魚麗  
笙由庚歌南有嘉魚笙崇正歌南山有臺笙由儀遂  
歌鄉樂周南關雎葛覃卷耳召南鵲巢采蘋采芣旅  
酬無算樂賓醉奏陔

注云笙者以笙播此三篇之詩也南陔白華華黍  
皆小雅篇也今亡開代也謂一歌則一吹也六者  
皆小雅篇由庚崇丘由儀今亦亡矣周南召南國  
風篇也王后國君夫人房中之樂歌也夫婦之道  
生民之本王政之端此六篇者其教之原也故國  
君與其臣下及四方之賓燕用之合樂也鄉樂者  
風也小雅爲諸侯之樂大雅頌爲天子之樂鄉飲  
酒升歌小雅禮盛者可以進取燕合鄉樂禮輕者  
可以逮下也春秋傳曰肆夏繁遏渠天子所以享



元侯也。文王大明綿，兩君相見之樂也。然則諸侯之相與燕，升歌大雅，合小雅也。天子與次國小國之君燕，亦如之。與大國之君燕，升歌頌，合大雅。其笙閒之篇未聞。無算樂，升歌合樂無數也。取歡而已。其樂章亦然。陔，陔夏也。賓出，奏陔夏以爲行節。若以樂納賓，則賓及庭，奏肆夏。賓拜酒，主人答拜而樂闋。公拜受爵，而奏肆夏。公卒爵，主人升受爵以下。而樂闋。升歌鹿鳴，下管新宮。笙入三成，遂合鄉樂。若舞則勺。

一人者宰夫也。凡燕卿大夫則以大夫爲賓，宰夫爲主人。注云：不以所與燕者爲賓者，燕爲序歡心，賓主敬也。公父文伯飲南宮敬叔酒，以路堵父爲客。此之謂也。又案下管新宮者，以管奏新宮之篇也。笙入三成，以笙入閒歌也。遂合鄉樂，卽二南也。此四節之樂，皆與前同，但次節易笙爲管耳。蓋管重於笙。虞書周禮下管禮記升歌清廟下而管象，皆重樂也。至第三節以笙閒歌，則上下皆同。虞書曰：笙鏞以閒，是也。此言笙入三成而不言歌言閒。



者蒙上笙文耳。注疏謂笙入三成正謂笙奏新宮三終申說下管之義恐非文意也。但因疏言新宮三終可知升歌鹿鳴者亦升歌鹿鳴之三終也。閒合各三俱與前文同。或不言者皆省文耳。

大射儀樂人宿縣于阼階東。笙磬西面。其南笙鐘。其南鑪皆南陳。建鼓在阼階西南。鼓應鼙在其東南。鼓西階之西。頌磬東面。其南鐘。其南鑪皆南陳。一建鼓在其南。東鼓朔鼙在其北。一建鼓在西階之東南面。簫在建鼓之閒。鼗倚於頌磬西紘。

注云大射者諸侯將有祭祀之事與其羣臣射以觀其禮數中者得與於祭不數中者不得與於祭也笙猶生也東爲陽中萬物以生是以東方鐘磬謂之笙皆編而縣之鑄如鐘而大建猶樹也以木貫而載之樹之跗也南鼓謂所伐面也應鼗應朔鼗也先擊朔鼗應鼗應之鼗小鼓也在東便其先擊小後擊大也鼓不在東縣南爲君也言成功曰頌西爲陰中萬物之所成是以西方鐘磬謂之頌朔始也奏樂先擊西鼗樂爲賓所由來也鐘不言



頌輦不言東鼓義同省文也一建鼓在西階之東  
言面者國君於其羣臣備三面耳無鐘磬有鼓而  
已其爲諸侯則軒縣蕩竹也謂笙簫之屬絃編磬  
繩也疏云云鼓不在東縣南爲君者決下一建鼓  
在其南東鼓者爲賓也愚按一建鼓在其東者爲  
君一建鼓在其南者爲賓則一建鼓在西階之東  
南面其與賓主共之者與

乃席工于西階上少東僕人正徒相大師僕人師相  
少師僕人士相上工小樂正從之乃歌鹿鳴三終主

人獻工乃管新宮三終

注云徒空手也正僕人之長師其佐也士其吏也  
天子眡瞭相工諸侯兼管是以僕人掌之愚按歌  
鹿鳴三終者卽鹿鳴四牡皇皇者華也注以爲歌  
鹿鳴而不歌四牡皇華者非是











